

Otro siman tin

Presentacion di e buki: *"E negoshi di koffie na Aruba"* na Biblioteca Nacional



DIARAZON awor, dia 7 di december 2016, pa 7'or di anochi lo tin presentacion di e buki

'E negoshi di koffie na Aruba' na Biblioteca Nacional Aruba na Oranjestad.

Biblioteca Nacional Aruba, Instituto Pedagogico Arubano, Departamento di Cultura Aruba y organisador Mirto Laclé ta invita pueblo di Aruba en general pa asisti n'e evento multicultural cu presentacion di e buki 'E negoshi di koffie na Aruba'. Lo tin presentacion di charla y pa deleita e publico lo tin musica, canto y baile cu potpuri Colombia pa Gloria Vega, Anaïsa Orman, John-Fredy Montoya, Festus Bargues y Jorge Croes.

Na inicio di e decada di añanan 60 di siglo pasa Aruba a aparece riba mapa di e paisnan exportador di koffie mas importante di mundo... sin cultiva ni cosecha ni un pipita di e planta.

E magia comercial aki di exporta for di Aruba un



producto cultiva na 1.200 pa 1.800 meter riba nivel di lama, solamente tabata posibel danki n'e vision, creatividad y inteligencia di algun comerciante local.

Nan a logra converti e negoshi di koffie den un negoshi lucrativo, creando fuente di trabou y actividad y diversidad comercial tempo cu turismo ainda tabata den bruki y Aruba su pilar economico tabata depende di refineria Lago, den constelacion di Antia Hulandes.

E autor, Benjamin Romero, lo ta presente y lo duna un charla tocante su trabou, entrevista y investigacion cu a conduci na produccion di e buki interesante aki.

Benjamin Romero a nace na Aruba. El a realisa su estudio escolar y universitario na Colombia, pais di origen di su mayorman.

Despues di a gradua Benjamin a establece su mes na Aruba, unda e tin mas cu 20 aña trahando den prensa.

'E negoshi di koffie na Aruba' ta su prome buki. Actualmente e autor ta sigui traha como periodista di e corant 'Bon Dia Aruba'.

E buki lo ta obtenibel e anochi aki. Entrada p'e evento ta gratis.

Pa mas informacion por tuma contacto cu Mirto Laclé: 742-6274.